

Cussegl grond ha tschernì la via d'amez

La lescha fiscala grischuna po vegnir revedida

DA FLURIN ANDRY / ANR

■ **Il parlament grischun ha acceptà il cumpromiss proponì da la maiorità da la cumissiun predeliberanta. Quel ha per consequenza mintgamai 11 milliuns francs damain entradas per il chantun sco era per las vischnancas.**

L'onn passà d'atun aveva il parlament federal deliberà la lescha federala davart la refurma fiscala e la finanziaziun da l'AVS. Il cussegl federal ha l'intent da metter en vigur questa lescha da Bumaun 2020. Fin quella giada ston tut ils chantuns avair adattà lur leschas fiscalas chantunalas a la nova lescha federala armonisada. En Grischun ha la cumissiun dal cussegl grond per economia e taxas predeliberà mez avust la missiva da la regenza davart la revisiun parziala da la lescha da taglia per il chantun Grischun (realisaziun da la RFFA). Tant la fracziun da la pcd sco era la fracziun da la ps han annunzià curt suenter da pretender cleras correcturas tar il sboz da la regenza sco era tar las propostas da la cumissiun predeliberanta. Gievgia ha tractà il cussegl grond il rapport da questa cumissiun presidiada da *Reto Loepfe* (pcd, Razén).

Cumissiun da different avis en plirs puncts

Tenor la missiva duai la taglia sin il gudogn da persunas giuridicas vegnir sbasada dad actualmain 5,5 pertschient sin quatter pertschient. Da quest'opiniun era er la maiorità da la cumissiun.

In'emprima minorità pledava per in sbassament pli pitschen sin 4,5 pertschient e la segunda minorità refusava dal tuttafatg in sbassament e proponiva da mantegnair la tariffa actuala da 5,5 pertschient. In segund punct contestà era l'imposiziun da taglia sin patentas e sin dretgs cumparegliabels. Qua proponiva la maiorità da la cumissiun ina reducziun da 90 pertschient per la lavur da perscrutaziun e da svilup, entant ch'ina minorità sustegnava la proposta da la regenza, numnadamain 70 pertschient reducziun. Tar in ulterior punct, la distgargia maximala, sustegnava la maiorità da la cumissiun predeliberanta la proposta da la regenza, numnadamain ina distgargia da 55 pertschient. In'emprima minorità da la cumissiun vuleva auzar la distgargia sin 60 pertschient ed ina segunda minorità vuleva sbassar quella sin 33 pertschient.

Cumpromiss da vart da las partidas burgaisas

Da differenta opiniun era la cumissiun era pervi da las mesiras da distgargia per las persunas naturalas che vegnan pretendidas da tuttas varts en connex cun la realisaziun da la RFFA. La cumissiun refusa cleramain la proposta da la regenza che prevesa in augment da la pauschala per ils custs da professiun. La maiorità da la cumissiun vul auzar l'import liber da taglia da 15 000 francs sin 16 000. La minorità da la cumissiun propona d'augmentar las deducziuns per las contribu-

ziuns a favur d'assicuranças socialas, e quai per distgargiar las persunas natiralas. Loepfe ha infurmà ch'ins haja chattà in cumpromiss burgais, cunter il qual i saja mo la fracziun da la ps. «Quel cumpromiss prevesa in sbassament da la taglia sin il gudogn da las persunas giuridicas sin 4,5 pertschient ed ina distgargia maximala da 50 pertschient e l'import liber da taglia duai impurtar 15 500 francs», ha ditg Loepfe.

Daplirs votums per che cunter la via d'amez

Il commember da la cumissiun, *Lukas Horrer* (ps, Cuira), ha accentuà che la distgargia da la taglia sin gudogn na saja betg d'avantatg per il Grischun «ed er betg gista». El ha proponì da refusar il cumpromiss e da distgargiar ils lavurers e procurar per ina buna tgira d'uffants. *Carmelia Maissen* (pcd, Glion) ha punctuà che la situaziun economica saja en Grischun fitg eterogena, cun regions fitg fermas ed autras mo debblas: «Perquai ha decis la fracziun da la pcd per il cumpromiss.» *Bruno Loi* (pbd, Avras) ha manegia ch'il Grischun saja gia uss in chantun attractiv per interpresas e ch'il chantun e sias vischnancas possian sa prestar il cumpromiss: «Uschia na periclitain nus betg quai ch'il Grischun ha cuntanschì fin uss.» *Heinz Dürler* (pps, Maiavilla) ha avertì ch'il cumpromiss fetschia baingear in zic mal, ma ch'i saja meglier da l'sustegnair che da ristgar «consequenzas nunenconuschentas». Ina da quellas con-



Reto Loepfe, il parsura da la cumissiun.

FOTO O. AEBLI-ITEM

sequenzas pudess esser, a l'avis da *Peter Engler* (pld, Tavau), «interpresas che bandunan il Grischun per ir en chantuns fiscalmain pli attractivs». Cussegl gvernativ *Christian Rathgeb* ha ditg che la regenza sustegniva il cumpromiss, «el pusibilitescha al Grischun da mantegnair

sia capacitat da concurrer». Da quel avis era la gronda part dals deputads e da las deputadas ch'han prendì il pled, mo la fracziun da la ps era per part d'auter avis. Cun gronda maiorità ha acceptà il cussegl grond ils different puncts dal cumpromiss.